

PLÊF DI S. MARTIN VESCUL
RUALP E VAL
33022 CJARGNE

Gjar Pierluigj,

o ài stât 'e to "investidure" clerical sabide passade tal to paîs. O vevi tancj mutîfs par vignî. Prin di dut parceche ti ài simpri volût bon pe to simplicitât e pe to onestât e ti ài amiratât parceche tu às savût tignî dûr di front a predis cjastrons ch'a fasevin di dut par stufâti. O ài gust che ancje il vescul le veti capide finalmentri ch'al à dut ce vuadagnâ a vê predis ch'a setin svelts e no conis.

O ài volût vignî ancje parceche si tratave di un predi cjargnel. Cheste tiere cussì puare a jè stade puare ancje di predis. No sai s'al è un merit o un difiet. Cert che la Cjargne a'nd'â glotûts di predis, però a'nd'â butâts fûr pôs. Forsit par chel anticlericalisin che lu an tal sanc; forsit parceche par vieri i predis ch'a mandavin cassù no àn fat cuissà ce figurone, tant plui ch'a'n' mandavin plui di un par cjastic, ch'al sares come dî che là ch'al coventave il mior a mandavin il piês. No stà mai lâ a cirî la logjche in curie. Tu 'n' cjatis di plui tes ostariis! Forsit in Cjargne a son saltâts fur pôs predis parceche o vin un sclip di protestantisin intorsi, vadî lis nestris robis s'es risolvî cun Chel lassù cence nissune sensarîe o missete. Chesçj i fats.

O soi vignût vultir ancje parceche o vevi gust di viodi a nassi un predi. Cuan che mi àn fat me, propit dîs agns fa, o erin tant maucs che no vin rivât a capî nuje e t'al spiegarai plui indenant. Al sucêt come tal maridaz: ducj a fasin fieste e i nuviz a no viodin l'ore ch'a finissi la sornade parceche a son chei ch'a gjoldin di mancul: "il trastullo e la vittima" al disares Manzoni.

Tu sês diventât predi tal to paîs. Al è tant just che no capîs parecche no lu fasevin ancje ai miei tîmps. Di miei di jessi consacrâts e onzûs denant dai tiei gjenitors, de to int, de to comunitât che ti à viodût frut, dispietôs e vîf come ducj, che ti à judât a madressi te fede, te sperance, te caritât! No savares cjatâ un lûc plui adat. O vares vût gust che la int di Tualies a ves podût jessi tal prin puest, ma o vevis dai dovês di ospitalitât ancje cun chei di Colugne e cussì forsit la part dal leon le àn fate lôr. Mi à displasût di no sintî une peraule par cjargnel. Ce ustu, al sarâ ancje un balin il gno, ma di cuant ch'o soi cassù o ài capît che la nettre biade int e à tant pôc di so che se tu j gjavîs ancje la lenghe tu le copis dal dut. Chest tu ti 'nacuarçarâs plui in là, cuant che, come ch'o speri, tu fasarâs 'speriense di ce ch'al ûl dî fevelâ la lenghe de int, incjarnâsi fint insomp. Alore tu viodarâs che no si trate di folclor ma di anime, no di monadis ma di vite.

Ti àn distinât, mi semèe, jù dongje Udin, a Padier. Lajù a vîf une comunitât di singars. O speri che tu ti 'nacuarçarâs ch'a vîf e a scombat ancje une comunitât di furlans. No sta lassâti vinci de tentasion de sitât. Plui che une mari a jè une strîe, plui che un rifugjo a jè une sejaipule, plui che un vuadagnâ al è un pierdi. Ti fasaran tancj discors di comunitât, di verifiche, di testimoneance, ma a podaran lâ a platâsi in confront dai discors gjenuins e ancje des crostis cha tirin jù i nestris oms di paîs cuant ch'a coventin. In chê dì che tu metaressis

intor, par disgracie, la munture de sitât, tu varessis pierdude dute la to scletece e gjenuinitât. Parceche la sitât ti incèe ma no perdone: ti scjafoe.

Mi à plasût viodi dute chês schirie di predis. A'nd'è ancjmò. Di bogns, di scarts, di sempliz, di galioz, di rocs, di onescj, di dionescj. A'nd'è di ogni misure, ma a'nd'è. Il vescul al vai parceche a calin lis vocasions. Al vares di vaî se i predis a son stupits o scarts, no s'a'nd'è pôs. Chei a son afârs che j'interesin al paron de campagne (Luche 10, 2). Une cumbricule un pôc balorde chês dal predessam, distacade dal mont, ch'a cîr di difindisi miei ch'a pò, di no distudâsi come chês tribûs de Amazonie ch'a si lein tai boletins. Une tribû ch'a scugnarâ distudâsi, parceche e jè sterpe o parceche a jè un prodot di un'epoche ben deteminade. Cun chest no mur la religion, ch'a jè une robe ch'a no à nissun cefâ cui predis, tant plui che nissun nol à ancjmò dimostrât ch'a son i predis a fâle lâ indenant. Se mai bisugnares dî l'incontrari.

I vescul, te so predicje un pôc astrate e gramatical, al à insistût sul fat che in chel moment al ere lui ch'al viergeve il spinel e al spissulave jù, cul vueli, ancje il podê di Crist predi, re e profete. Parâtri j'tocjave a lui fâ propagande pe so marcansie! Lui ti à dât la legalitât, vien a staj il tinbro, la cjarte intestade de Glesie. No crôt che tu vetis sintude la scosse, parceche no passe nissune fuarce. No son chei âtris ch'a puedin fâti sant, ma ti tocje a ti consacrâti dibessol 'e veretât (Zuan 17, 19). La Glesie a pò dâti la cjarte intestade a so non; a pò dâti un document là ch'a diclare ch'a ti mande jê; a pò fâti pressident, dut ce che t'ûs, ma ti tocje a ti fâti predi dibessol.

O vares vût mJOR ch'a vessin metût in lûs no ce che il vescul ti dave, che al ere dome un sacrament, un segno, ma il fat che un zovin di Tualies, tû, al cjapave l'impegno di metisi, come Mosè, denant dal so popul par menâlu o judâlu a lâ fint insomp de mont dal Signor. La fieste si à di fâle per chest at di cjapâ sù uficialmentri il compit di jessi no plui dome un fradi, ma ancje pari, mestri, guide dal popul. No pai timbros. Pa me il predi al è predi cuant ch'al decît, cul ajût di Diu, di metisi denant dal popul, di dut il popul, in dut ce ch'al riguarde il popul. Parceche a Tualies nol è nassût un ministri di Diu, par vie che ogni om al à di servî il Signor senò nol è nancje om, ma in tun paisut de Cjargne, che la pluritât dai furlans no san nancje là ch'al è, un fantat al à decidût di lassâ tantis robis ancje sacrosantis par podê jessi dut pe so int. Achì al sta il miracul. Chês âtris funksions a siervissin cussì, di contorno, ma la sostanse a jè cheste. E le à dite taronde pre Nesto di Davar cuant ch'al à invidât ducj chei ch'a erin lì no a stâ sot dal ordin dai predis, ma ducj, scomençant dai predis, a stâ sot dal ordin di Diu.

Mi à plasût vioditi cussì saren, content, cence emosions di nuvice. Nô o erin tant ôcs che nus pareve di murî in chês dî. O ài denant dai voi il litrat che nus àn fat in Domo. Ducj sgjavelâts, cui voi discocolats e lusinz, rôs e imbarlumîts come s'ò vessin cjapât cuissà ce. Nus vevin tan inbussulâts che, s'a nus vessin domandât di murî magari un'ore dopo la consacrazion, lu varess fat, e vulintir. Dome il vescul al rideve, parceche al veve cjatât 18 fameis in plui.

A mi mi vevin contât che la messe ch'ò vevi di dî a ere une robone tan grande che nancje un agnul, cun dut ch'al ere agnul, nol ere in grât di fâ chel tant. Nancje la Madone, ch'a scugnive rassegnâsi a fa la cumunion, ma no podeve dî Messe. Dome Crist e il predi, ch'al ere alc come Crist. *Sacerdos alter Christus, ipse Christus*. E nô a fâ provis s'ò disevin just cuant che si alçave, stâ atents di no distrajsi, di vê l'intension atual o amanco chês abitual. Mi visi che in

chê di de prime Messe mi è vignude tante di chê pore che mi à tacât un mal di panse che no vevi mai provât un compagn; o ài scugnût fermâmi a Ospedalet a bevi un bussul par fâmi corajo e lâ a meti in crôs il Signor par ducj i oms. Dopo o ài cjapât spirt e o ài savût che la stesse robe, cun dut rispiet, ur capitave ancje ai maridâts la prime volte. Dome che lôr a vevin plui corajo di me.

No ti dîs la fieste tal paîs. Bandierutis, peçoz par ogni bande, scanpanotâ, la bande, la prucission, il discors dal sindic, i evivos de int, i vecjos ch'a vaivin. E dut par tignî sù il mito dal predi, par metilu in te maine e lassâlu alî ch'a si rangj. Pensant ben, dopo, mi à parût che chês fiestis de prime Messe a erin come chês ch'a fasevin i pagans cuant ch'a puartavin un manç, dut inflochetât, denant dal altar dal diu par copâlu pai peciâts de int. Opur si pò pensâ ai Ebreos, ch'a cjapavin un bec, lu cjariavin di dutis lis lor tristeriis e po' lu paravin fur, tal desert, par ch'al stes dibessol a puartâ lis consequens dai pecjats de int (Lev. 17, 22). Une maniere avonde comude di lavâsi lis mans, come che àn simpri fat cun nô. Nus davin spongje e formadi e cun chel a rinusiavin ai lor dovês viers la religjon, ch'a diventave afar dal predi, pajât e mantignût par chel. Dome che nus tocjave di lâ in tal desert, metisi in alt. No erin plui dai lôr, parceche nus mandavin "*in terram solitariam*".

Di chest mi soi 'nacuarçût a sec. Par un sclip di vueli che il vescul mi veve strucjât tes mans, no eri plui un dal paîs. Parfin i miei compagns di scuele e di dispiets mi davin dal lui, a vevin riguart. A son vignûts a bussâmi lis mans ancje chei che mi vevin dât pachis dibot fin la vèe di diventâ predi. Viodistu ce ch'al pò fâ un tinbro, une cerimonie, cuant che la int no à cussiense de so dignitât. Parfin me mari e gno pari a vevin un cert riguart. Un fî predi, ch'al pò benedî e maludî, ch'al à fate la scuele nere! Ce robatis! E la int a faseve fieste par me ancje se ta chel stes moment la tradivi, passant di cheâtre bande, de bande dai parons, dai studiats, dai riverîts. Cuant rivarino a parâ jù ducj i debits ch'o vin ingrumâts cui inbrois dal clericalisin? Fin cuant rivarino a dâle a intindi? Nol è onest fâsi fuarts su la pore de int nè meti sù un vistît di strion o di strolc par che la int ti mantegni e ti tiri jù tant di cjapiel. E ancjmò nus vanse di ridi dai africans!

Tal discors che mi à fat un predi, al à dit che il regal plu grant che Diu al pò fâ a di une famèe al è chel di dâj un fî predi. E la int di Vençon a cjalave me mari e s'ingropave. J disevin ducj: "Ce furtunade a vê un fî predi!" Puar gno pari che, pe comosion, al ere un pôc pontât, j à rispuindût a di un so amî: "Prèe il Signor, copari, che no ti tocj ancje a ti une furtune dal gjenar! A va sui doi millions e ancjmò al è di cheâtris". Dome cumò o capîs cetant sintiment ch'a vevin chês peraulis. La furtune par un gjenitor no jè chê di vê un fî predi, cui cotui e vedran, ma chê di vê un fî ch'al cjamini pal troi di Diu. E chest a podin vêlu ducj, ancje cheâtris.

Mi vevin dit in seminari che bisugnave a ducj i coscj ch'o salvassin animis. Plui si'n' salvave e mior al ere. S'a'n' salvavin amanco une, o siguravin la nestre. S'a rivavin a fâ di plui, o erin in credit. E alore jò o domandavi al Signor che mi fases murî apene salvade la prime anime, ma une o scugnivi salvâle, in cussiense. L'ocasion mi è plombade pòs dîs dopo predi. Mi à clamât per un vueli sant. A ere rivede l'ore e no stavi nancje sù pe emosion. S'a no rivavi a salvâ chê anime, mi vares maludît par in socula. O soi lât jù di corse cun ducj i imprescj: libris, vueli, stole, Crist. Dut l'arsenal ch'al coventave par salvâ. O sai rivât in cjase, ma il biât nol deve segnos di vite. O ài preât, o ài onzût, o ài assolt

fin ch'al è spirât. O soi restât mal, parceche no si ere nancje nacuarzût di dute chê ufisiature! Lu vevio salvât o no? Lu vevio salvât jò o erial stât chel gotut di vueli rangit? Mi pareve che no vevi salvât un biel nuje, ancje s'a mi vevin dit che i sacraments no sbaljavin smicje.

Cussì a scomençarin lis primis delusions. O vevi di salvâ predicjant, ma la int no vignive a scoltâmi e ce ch'o disevi no ur interesave par nuje. O fasevi dutrine e i fruts no viodevin l'ore di scjampâ a zujâ. O fasevi conferensis ai zovins su Crist e lôr a fevelavin de fantate. Ce difiçil salvâ un'anime! Mi rassegnavi parceche o eri famei. Al veve di rispuindi il plevan!

Cuant ch' soi vignût in Cjargne, a 27 agns, e o ai metude sù cjase, o ài dit al Signor: "Cumò no pues tirâ fur cantîns. Se no ju salvi, a jè colpe mê". Ma la liende a ere simpri compagne. Cualchi vueli sant dât cuant ch'a erin zà di là. Cualchi confession sbrovade su a pasche. Un sclip di dutrine ai fruts ch'a spetavin dome di cressi par no vignî plui. Cualchi peraule di confuart ai vecjos che, tal ultin, mi domandavin s'a vevin cressude la pension... Insome, par fâle curte, o soi ancjmo a salvâ la prime anime e il timp al passe! Però une robe le ài imparade: che no mi tocje a mi di salvâ nissun, parceche ancje jò o ài di salvâmi, e che Crist nus salve ducj, bogns e triscj. Par chest o ài mandât su l'ostie i libris dal seminari e chei ch'a mai vevin insegnâts a doprâ. Cumò o soi plui content e se ancje no salvarai nissun, no mi fâs trist sanc, parceche o àj rivât a capî che no ài di puartâj vie il mistir al Signor e che jò o soi come un pressident di latarie, ch'al covente, però a coventin plui vacjs ch'a molgin. Ridimensionant il predi, tornant cu la int, o ài tornât a vivi, a capî ce ch'al ûl dî jessi metût fremieç dal popul par liberâlu e judâlu a cressi, no par istupidîlu. O ài scuvierzût ch'o ài tantis robis di dî 'e me int che no rivi adore a dîlis dutis; ma par cjatâ un rapuart cun lôr o ài scugnût saltâ fur de maine e dismantâ jù de nicje là che mi vevin metût. O ài scugnût tornâ cun lôr, cence pratesis o cence nissune fuarce esterne o daur di me. Dome la fuarce de veretât e de onestât. O àj scugnût tornâ om, butant da bande toniis e striaments.

Parcè mo ti ào contadis chestis robis? Parceche o pensavi di podêti judâ contant la me 'speriense, che chê di cheâtris, ancje dai libris, no jè mê. Cumò che tu sês tal gno scjap, ch'o sin fradis tal stes predessam di Udin, o pues ancje dîti chê ch'a jè la mê inpinion e il gno consei.

Tu às tre stradis di sielgi.

La prime a jè chê de veretât. Presentanti come che tu sês, tu às di dâj une man al popul a liberâsi di dutis lis cjadenis che lu tegnin peât. Tu às di liberâlu de pore dal diaul, dai predis, dai potents. Tu às di fâlu cressi te libertât, cjaminant denant di lui viers la tiere promesse. Se tu sielgis cheste strade, tu ti cjararâs cuintri, inpreteribil, il vescul, i predis, i pulitics, i parons, i patafebancs. Forsit ancje i tiei amîs. Tu varâs dome il confuart di Crist e chel de to cussiense.

Tu puedis sielgi la seconde, ch'a jè chê de pluritat dai predis: no metisi cuintri nissun, fâ funksions, dutrine, tirâ dongje i plui biâts, da reson a ducj e no inpaçâsi cun nissun. Lassâ che la biade int a vadi pe so strade, a patisi e a mueri. Dopo ti clamaran pai funerai. Se tu sielgis di jessi cence nè sal né pevar, no tu varâs cuintri nissun. Tu fasarâs dome dûl.

La tierce le àn sielzude plui di un. Freâsi de int e metisi de bande da potents. Tu varâs bêçs, amîs, ti fasaran bonsignor, tu podarâs metiti da bande ancje cualchi franc. Tu varâs il podê. Tu ti cjararâs benon in chest mont. Tu

varâs dome cualchi fastidi a rispuindi a di Chel che ti veve mandât a fâ di dut fur
che chestis porcariis e ancjmò a non so.

Come che tu viôs, tu às ce sielgi. E cumò rangjti. Mandi.

Val e Rualp, 19 di otubar 1975

pre Antoni Beline, plevan